

## È VEUT CHEÛDRE LAI MÔDE !

V – Le drie còp qu'nôs ains baidgelè ensoinne, i t'aivôs d'maindè se te cheûyôs lai môde. I n'ai pe rébiè c'qu't'm'és réponju.

Fr – S'te n'l'és pe rébiè, poquoi ât-ce qu'i dairôs rèc'mencie, te sais qu'i n'ainme pe djâsè po n'ran dire.

V – Eh bîn, te vois, que te cheûyeuches lai môde, çoli m'bèye di tieûsain.

Fr – T n'és pe fâte d'aivoi pavou, i seus t'aivu è boénne écôle c'ment dyînt nos véyes dgens « è fât toûedje saivoi réjon voidgeaie »

V – D'mon temps, i aî ôyi nos dgens dire âtrement : « ah lai môde ! lai môde, ç'ât les malins qu'lai fînt et peus les fôs lai cheûyant. »

Fr – Se çoli t'peut raiss'nédie, i n'aî ran è voûere aivô ces dgens-li ! Di sné, i y en aî tot piein !

V – Ç'ât c'qu'i craiyôs dj'ainqu'è dûemoinne péssè. I y aî réchue mes brelitçhes, i aî eûvri mes eûyes aich' grôs qu'i poyôs, mes arayes aito. I m'seus dit : c'tu-ci, ce s'rait not' François qu'i n'en s'rôs pe émaîyie ?

Fr – Qu'ât-ce que te raibaboénes, dûemoinne, i seus allè â môtie, c'ment tos les dûemoinnes aivô tos les dgens d'Banv'lai. Nos ains praiyie et peus nos sons r'venis è l'hôtâ.

V – I t'dis qu'i t'aî vu. I aî t'aivu di mâ d'te r'coégnâtre. Laivou qu't'aivôs trempè tes pois, te n'en n'aivôs pus piepe yun d'biainc. Tai Djeannette t'aivait botè des bigoudis ou bîn tiu qu'çât qu't'aivait chi bîn empèrruquè. Qu'ât-ce qu'è n'fât pe faire po être è lai môde !

Fr – Te r'bôles mai boénne dgen, se i y aivôs v'lu cheûdre lai môde, c'n'ât pe dînche qu'i m'serôs chitçhè.

V – Te veus encoé m'envie me faire è déboûet'chi les arayes, poétchaint, çoci, c'nât pe des mentes, te veus bôtè è profit les aivsâles de ci Nicolas ?

Fr – Qu'ât ce que t'és encoé r'trovè ? Çoli n'me fait pe è rire, te veus m'engraingnie.

V – Te n'és pe dit d'vaint tos les dgens qu'étînt li que te tieurôs in djob' po rempiâtre tai baigatte ? Et hô, ci Nicolas, èl é bîn djâsè : « po diaingnie pus, è fât traivaiyie pus ». Dâli, not' François, en pus de yeçons d'patois, è veut encoé béyie des yeçons de ski !

Fr – C't'annè, i n'airôs pe aivu brâment d'bésaingnes, lai noi, elle ât d'moèrè dains les hâtous des cies.

V – Oh ! ç'ât cré bîn meu dînche, t'és aivu tçhitte de raiméssaie chu les FFS. En bon patois, sains qu'çoli feuche métchaint, i te dirôs de tchoère chu l'tiu. Vôs voites laivou qu'çoli moine de cheûdre lai môde.

Fr – Po l' aimoé de Dûe ! Mains cache-te, airrâte tes bétijes, c'que t'raicotes li, ç'ât c'qui aî djûe â théâtre. D'Banvlai po péssaie enne vâprèe pus ryuéjainne que ci croûeye temps qu'nos aivîns. De feus è pieuvait c'ment vaitche que piche. Vôs voites que lai môde n'aivait ran è voûere li – d'dains.

Valérie BRON – François BUSSER

Baîch'coét, saim'di vinte-quaitre de mârs 2007